

इवनिंग डोगरी न्यूज बुलेटिन

समे .18:15 Hrs

<><><><><><>

Headlines

1. विदेश सचिव विक्रम मिसरी होंरें ऑप्रेसन सिंदूर पर भारत दे राजनयिक संपर्क शा पैहले दुनिया भर दे मुल्खें च जाने आहले सांसदें दे प्रतिनिधिमंडलें गी अज्ज संसद च ब्यौरा दिता।
2. उपराज्यपाल मनोज सिन्हा होंरें केंद्र शासित प्रदेश च समूलची सुरक्षा स्थिति दी समीक्षा आस्तै श्रीनगर च इक उच्च सतह दी यूनिफाइड कमांड दी बैठक दी अध्यक्षता कीती।
3. मुखमंत्रि उमर अब्दुल्ला होंरें गांदरबल च प्रमुख परियोजनाएं दा उद्घाटन कीता ते माता खीर भवानी मेले दियें तैयारियें दा जायजा लैता।
4. बी.एस.एफ नै पंजाब बन्ने कन्नै लगदी त्र'उं सांझी जांच चौकियें पर रिट्रीट समारोह गी परतियें शुरू करने दी घोषणा कीती, रस्मी हत्थ मलाना मुअतल रौहग।
5. मधुमक्खी पालन गी बढ़ावा देने आस्तै अज्ज दुनिया समेत जम्मू च बी मधुमक्खी सरबंधी कुल संसारी ध्याड़ा मनाया जा'रदा ऐ।

<><><><><><>

Misri-Briefing

विदेश सचिव विक्रम मिसरी होंरें ऑप्रेसन सिंदूर तैहत आतंकवाद खिलाफ भारत दी रणनीति कन्नै दुनिया गी अवगत करोआने आस्तै कई सारे मुल्खें च भेजे जा 'रदे सांसदें दे सर्वदलीय प्रतिनिधिमंडलें गी अज्ज नमीं दिल्ली च लोड़चदी जानकारी दिती। सरकार पाकिस्तान प्रायोजित आतंकवाद खिलाफ भारत दा रूख साफ करने आस्तै बक्ख-बक्ख मुल्खें च 7 सर्वदलीय प्रतिनिधिमंडल भेजा रदी ऐ। 59 सदस्यीय एह प्रतिनिधिमंडल कल्लै थवां 5 जून तगर कुल 32 मुल्खें दा दौरा करोग। अपने 10 दिन दे दौरे दौरान भारती प्रतिनिधिमंडल आतंकवाद दे हर इक रूप कन्नै निब्बड़ने आसतै मुख दी राश्ट्रीय नीति ते नजरिए कन्नै दुनिया गी अवगत करोआग ते आतंकवाद गी दना बी नेई बर्दाश्त करने आहले भारत दे स्नेह गी अंतरराश्ट्री समुदाय तगर पजाग।

<><><><><><>

LG-Unified Meet

उपराज्यपाल मनोज सिन्हा होंरें अज्ज श्रीनगर दे राजभवन च इक उच्ची सतह दी एकीकृत मुख्यालय यानि यूनिफाइड कमांड दी बैठक दी प्रधानता कीती। बैठक दे दौरान केंद्र शासित प्रदेश च समूलची सुरक्षा

स्थिति, आतंकवाद रोधी अभियानें ते सुरक्षा एजेंसिएं बशकार समन्वित रणनीतियें दी इक व्यापक समीक्षा कीती गई। बैठक च मुख सचिव, सेना, पुलस ते कई होर एजेंसिएं दे अधिकारी बी शामिल होए। उपराज्यपाल होरें शांति ते स्थिरता यकीनी बनाने आस्तै उच्च सतह दी सतर्कता ते अंतर एजेंसी सहयोग ते तालमेल बनाई रखने पर जोर दिता।

<><><><><><>

CM-Ganderbal

मुखमंत्री उमर अब्दुल्ला होरें अजज गांदरबल च बकुरा पानी सप्लाई योजना दा उद्घाटन कीता। जल शक्ति मैहकमे आसेआ बनाई गेदी इस योजना कन्नै साफ ते सुरक्षित पीने आहला पानी दस्तयाब कराइयै 4 जहार कोला मते बसनीकें गी फायदा होग। मुखमंत्री होरें जम्मू-कश्मीर च हर इक्क घरै आस्तै पानी दी पुज्ज यकीनी बनाने दी सरकार दी बचनबद्धता गी पक्का कीता। उनें पंडाच इलाके च इक वृद्धाश्रम दा बी उद्घाटन कीता। उनें सरकारी इंजीनियरिंग ते प्रौद्योगिकी कॉलेज सफापोरा च साइंस ब्लॉक ते गांदरबल च वेटनरी अस्पताल दे नीह पत्थर बी रक्खे। मगरा मुखमंत्री होरें औने आहले खीर भवानी मेले दियें तैयारियें दा जायजा लैने आस्तै गांदरबल च पवित्र खीर भवानी मंदर दा दौरा कीता। उनें आखेआ जे श्रद्धालुएं आस्तै इक्क सुचारू, सुरक्षित ते सुआगत जोग वातारण निश्चित करना सरकार दी प्राथमिकता ऐ। मीडिया दे प्रतिनिधिएं कन्नै गल्ल करदे होई मुखमंत्री होरें आखेआ।

<><><><><><>

PM-MKB

प्रधानमंत्री नरेन्द्र मोदी होर औंदे एतवारें यानि 25 मई गी आकाशवाणी पर प्रसारित होने आहले अपने महावार रेडियो कार्यक्रम मन की बात राए देश विदेश च रोहने आहले लोकें कन्नै अपने विचार सांझे करडन। एह इस प्रोग्राम दी 122मीं कड़ी होग। लोक अपने विचार ते सुझा टोल फ्री नम्बर 800-11-7800 पर भेजी सकदे न। एदे अलावा लोक अपने सुझा ते विचार नरेन्द्र मोदी एप ते माई गोव ओपन फोरम पर बी भेजी सकदे न। इन्दे चा चुने गेदे किश सुझाएं गी प्रधानमंत्री होर अपने कार्यक्रम च शामिल करडन। मन की बात लेई विचार ते सुझा भेजेने दी अखीरी तरीक 23 मेई ऐ।

<><><><><><>

BSF-Retreat

सीमा सुरक्षा बल नै घोषणा कीती ऐ जे अटारी, हुसैनीवाला ते सादकी पोस्टें पर रिट्रीट समारोह अज्जै थमां शुरू होआ करदा ऐ। पंजाब च अंतरराष्ट्रीय बन्ने पर स्थित अटारी, हुसैनीवाला ते सादकी पोस्टें पर रिट्रीट समारोह गी 8 मई गी आम लोकें लेई बंद करी दिता गेआ हा। पाकिस्तान ते पाकिस्तान दे गैर कन्नूनी कब्जे आहले जम्मू-कश्मीर च आतंकवादी ढांचे गी तबाह करने आस्तै भारत आसेआ चलाए गेदे ऑपेशन सिंदूर दे इक दिन मगरा रिट्रीट समारोह गी रद्द करने दा फैसला लैता गेआ हा। बी.एस.एफ नै दस्सेआ ऐ जे दौनें मुखें बशकार लगगे दे गेट भारती भेठा बंद रौहडन। सामान्य परम्परा कोला परे सूरज ढलने दे

मौके झंडा झुकाने बाद भारतीय गार्ड कमांडर ते उंदे समकक्ष पाकिस्तानी रेजर्स दे बशकार हत्थ मलाने दी रस्म नेई होग। बन्ने दे आर-पार दे खेतरें च करसानें गी निगरानी च अपनी जिमी दी अनुमति दिती जाहग।

<><><><><><>

Op. Sindoor

समूलचा मुख्य इनें दिनें आप्रेशन सिंदूर दी कामयाबी दा जश्न मना करदा ऐ जेदे तैहत पाकिस्तान ते पाकिस्तान दे नजैज कब्जे आहले जम्मू-कश्मीर च आतंकवादिएं दे 9 ठकानें ते सिखलाई केंपें गी तबाह करी दिता गेआ हा ते 100 कोला मते खतरनाथ आतंकवादिएं दा सफाया करी दिता हा। लोक आतंकवाद खलाफ भारत सरकार आसेआ लैते गेदे रणनीतिक ते सख्त फैसलें दा बी सौआगत करा करदे ना। इस कामयाबी दा जश्न मनाने लेई जित्थे तरंगा रैलियां कड्डियां जा'रदियां न, उत्थे गै समाज दे बक्ख-बक्ख वर्गें दे लोक बी भारतीय फौज दी इस कामयाब ऐतिहासिक कार्रवाई गी सराहना करदे ना। इस बारे आकाशवाणी जम्मू कन्नै गल्ल करदे होई मेजर जनरल रिटायर्ड गोवर्धन सिंह जम्वाल होरें आखेआ।

<><><><><><>

Tiranga-Yatra Reasi

भारती थेआरबंद बलें आस्तै जन समर्थन ते देशभक्ति दे जोशपूर्ण प्रदर्शन कन्नै ऑप्रेशन सिंदूर दी कामयाबी दा जश्न मनाने आस्तै अज्ज रियासी जिले दे कटड़ा च इक शानदार बाइकर्स रैली दा आयोजन कीता गेआ। एहदे च मुकामी बाइकरें, युवा समूहें ते साबका फौजियें उत्साह कन्नै हिस्सा लैता। इस मौके लोक राष्ट्रीय झंडे हत्थें च फगड़े दे हे ते देशभक्ति दे नारे लाए। आकाशवाणी समाचार कन्नै गल्ल करदे होई रैली च हिस्सा लैने आहलें अपने विचार सांझे कीते।

<><><><><><>

World Bee Jammu Day

मधु मक्खियं सरबंधी कुल संसारी ध्याड़े दे मौके पर राई-बाई निदेशालय जम्मू आसेआ कृषि भवन च इक खास कार्यक्रम दा सरिस्ता कीता गेआ। इसदा मकसद इंदी महत्वपूर्ण भूमिका बारे लोकें च जागरूकता पैदा करना हा। इस दौरान खुराक दी पैदावार ते पराग गी इक थाहर थवां दुई थाहर पजाने च मधु मक्खियें दी भूमिका गी उजागर कीता गेआ। निदेशक अरविंद्र सिंह रीन होरें भौर पालन दे आर्थिक लाह गी उजागर कीता। उनें करसानें ते युवाएं गी इसी अपनाने ते अपनी आजीविका दा हिस्सा बनाने लेई प्रेरित कीता। आकाशवाणी समाचार कन्नै गल्ल करदे होई उनें आखेआ।

<><><><><><>

IPL-Cricket

आई.पी.एल क्रिकेट च अज्ज संझा अरूण जेटली स्टेडियम च चेन्नई सुपर किंग्स दा मुकाबला राजस्थान रायल्स कन्नै होग। हालांकि दवें टीमा प्लेऑफ दी द्रौड़ थवां पैहले गै बाहर होई चुकी दियां न। कल रातीं लखनऊ सुपर जायंट्स दी टीम बी सनराइजर्स हैदराबाद थवां 6 विकटें कन्नै हारने मगरा प्लेऑफ दी द्रौड़ थवां बाहर ऐ। एहदे कन्नै गै फाइनल प्लेऑफ दे मुकाबले आस्तै मुम्बई इंडियन्स ते दिल्ली कैपिटल्स मैदान च रेई गए न। गुजरात टाइटन्स रायल चैलेंजर्स बेंगलुरु ते पंजाब किंग्स प्लेऑफ मुकाबले आस्तै पैहले गै अपनी थाहर यकीनी करी चुके देन।

<><><><><><>